

153
26701

ШКОЛЬНИКЛОН БИБЛИОТЕКА



И. ИЗЪЮРОВ

КУЗЬ ТУЙ ВОДЗЫН

Библиотека
Республиканского музея
Истории АССР
г. Йошкар-Ола


КОМИ КНИЖНОЙ ИЗДАТЕЛЬСТВО

1961

Иван Изгюров

КУЗЬ ТУЙ
ВОДЗЫН

ВИСЬТ



КОМИ КНИЖНОЙ ИЗДАТЕЛЬСТВО

Сыктывкар 1961

1900

К 287.1.1.1

Б О Д С И Н

1900

1900

1900



«Мун, лёк во, мун!..»

И. Куратов.— «1865 во петігөн».

Сійö жö няйт туй, тöдсә чойяс, посныдик öшинь-
яса руд керкаяс. Да и став ывлаыс руд: муöдз лэч-
чöм кымөрьяс, пöлöс потшöсьяс, ойбыралысь унзиль-
сиктьяс. Лöзым, Пажга, Ыб. На дінö матыстчигөн
верст-мöд сайын паськавлö туй ордым, воссьылöны ки-
пыдöс пасьта ыб вывьяс, ёнджыкасö керöс бокьясын.
А сәсся бара тшем парма — пемыд да гажтöм. Весиг
шочиник пожöмьяса яг нöрысьяс кажитчисны гажтö-
мөн тайö арся руд луннас. Дай эз нин сэтшöм частö
паныдасьлыны яг нöрысьясыс. Гөгөр вöлі гажтöм да
лöсьыдтöм, кыдзи и олöмыс му вылын.

Куратов бара на муніс сійö туйöд, кыті бöра-водза
прöйдитлывліс кольöм гожöмьясын, мамыс ордö кай-

лігъясөн. Но өд сәки унджыкысьсө вөлі шондіа гожом, кажитчө — ставыс ворсіс да сьыліс, быд турун сі и гаг, а өні сулаліс слөтитана ар. Дай сәки эз на օшав приказлөн сьөд вуджөрыс, коді өні вөлі сьлөн зеп-тын нин.

Ветлыны Куратов радейтліс тәрмасьтөг, кежавліс сиктса учительяс да төдсаяс ордө, коллявліс нақөд гожся шоньд рытьяс. А өні тәрмасис мунны өдйө-джык, мед ылысмыны и училищесыс, көні сійө велө-діс бөръя вит восө, и вунөдны ассъыс велалөм нин при-вычкаяссө, и весиг няйт уличаяса Сыктывдін карсө. Думнас көсийс пышйыны и приходскөй училищөө тэрыба котралысь детинкаясысь, кодъясөс Куратов век жө радейтліс.

Недыр кезлө сувтліс Визинө — сәні оліс вок, вө-ліны мукөд матысса төдсаяс. Рөдвуж налөн ыджыд, чой-вок уна. Көть кутшөм гөль вөлі дөва мамныс, но пиянсө быдөнөс кок йылө сувтөдіс.

Кольөм воөдз Куратов эз казав өдйө воысь лөк кымөрлысь матысмөмсө. Вөскресенньоясын шутитіс другъясыс ордын, лыддис выль виршаяс. Прөст кадъ-ясө ветлөдліс Сыктывдін карса «прешпектъяс» кузя, кызди сійө нимтывліс карлысь няйт уличаяссө. Кор-сюрө, унджыкысьсө субөта рытьясө, пыравліс Забоевъ-яс ордө. Невеста нывъяс кындзи, кодъяс сәні пыр вө-ліны керка тырыс, сэтчө сійөс кыскывліс и Василий Евгеньевич Кичин — семинарскөй другыс, а өні го-родскөй училищеса учитель.

Во-мөд сайын татчө воывліс и Порфирий Ивано-вич Войнаральский — Пензенскөй губернияысь кызь өти арөса помещик, Московскөй университетса студент, коді оліс тані ссылкаын студенческөй волнениеасын участвуйтөмысь. Куратовлы Порфирий Ивановичлөн сьөлөм вылас воліс ставыс — сьлөн веськыдлуныс, ыджыд мывкыда вежөрыс. «Вот өд: ассъыс озырлунсө оз жалит, ссылньой невөльникөн тані олө, а юрсө пыр

вылын кутö», — думайтліс Куратов Войнаральскийлөн мича чужöмөн унаысь любуйтчиг.

Порфирий Ивановичöс видзисны карын ретгид. Мыйкö дыра мысти сійöс мөдöдісны Яренскö, и Куратов быттö вокöс воштіс. Бур нин кöть сійö, мый Порфирий Иванович корсюрö сетліс ас йывсьыс тöдны гижöдторъяс ысталöмөн. И тайö негырысь гижöдъясыс, кодъяс эз вермывны, тöдöмысь, висытавны унатор йылысь, кыпöдлісны Куратовлысь сьölöмсö, сетлісны сылы вын водзö уджавны. Да, эз удайтчы сылы велöдчыны Москваын. Семинария бöрын сизим тöлысь олöм сәні воши весь. Эз тырмы ни вын, ни мукöдтор, мед лоны студентөн. Сәк эськö, гашкö, и помöдз орчöн сувтіс Порфирий Иванович коддьöмъяскöд.

Куратовлөн кольöм воын лои кутшöмкö предчувствие, мый и сылөн олöмас матысмöны гырысь вежсьöмъяс. Ок, кутшöма сылы öнi эз тырмы Порфирий Ивановичлөн ыджыд мывкыдыс!

Кольöм воö Василий Евгеньевич öтчыд шуліс Куратовлы:

— Тәнад виршаясыд, муса друг, лишнöй ёсьöсь да кодсюрöлы оз воны сьölöм выланыс. Миян йöзыд вывтi на пемыд, мед кыпöдны сійöс ыджыдтор вылö, кызди кöсйöны öткымын журналистъяс... А тәнад коми йöзыд — ещö нин... Ме весиг ог гөгөрво: сулалö-ö сы ради ыджыдтор ас вылад босьтны... Видзчысь, мед ставыс аслыд лёк вылö оз бергöдчы.

Кичинлөн вöлі еджоват кузь юрси, гырысь синъяс. Ставыс петкөдліс сылысь ыджыд вежөр. Та вöсна семинарияын велöдчигөн на Куратов матыстчис Кичинкөд, унаторйын кывзысис сылысь. Куратов тöдіс, кодъясöс колö вöлі гөгөрвоны тайö «öткымын журналистъяс» улас. Кичинкөд найö та кузя торъявлісны. Василий Евгеньевич асьсö век жö лыддыліс аристократөн, а Куратовлөн, тыдалö, плебейөн чужсьылöма, дай сійөн кöсйис кольны нәм помöдз.

Помканас Кичинлөн татшом кывъясыслы лои та-
тшомтор. Куратов став чукормом скорлунон уналы
кывмон шуис чорыд кыв распутинской «воздушной
творениеяс» йылысь. Семинарист Распутин, мед вы-
служитчыны преосвященство водзын да шедодны бур-
джык духовной сан, заводитома комиодавны церков-
ной стихъяс. Но коми кыв вылын Распутинлөн упраж-
няйтчомыс вולי сэтшом неудачной, мый Куратовлөн
сьоломыс эз терпит. Сийо нимтис Распутинос эгоистон
да хамон. Распутинкод पोшти откод вולי и Георгий
Лыткин, коди сидз жо мырсис коми стихъяс вы-
лын да вуджодалис коми кыв выло евангелие-
лысь главаяс. А ещо по од тайо Лыткиныс
корко матын волома Россияса передовой йозкод. Но
кутшом сийо вולי вылын настоящей народной поэзия-
ысь, народной нуждаясысь! И буретш тайо кык «пи-
тыс» пыдди эз пуктивны Куратовлысь уджео. Боръ-
яыс весиг карса учителяслы гижома ыджыд письмо,
кони сийо серало Куратовлөн зильомъяс вылын.

А сийо, Иван Куратов, сомын народной творчест-
воын аддзылис настоящей поэзиялысь истокъяссо.
Кызди тай ыджыд ю заводитчо ворса состом ельсянь,
сидзи и збыль поэзия заводитчо народлөн творчество-
сянь. Сэни став мичлуныс, чувствоис, кодъяс неку-
тшом семинаристъяслон оз вермыны чужны, отдорто-
ны ко найо прстой йозос. Гапко, сылон шусис и не-
уна чорыджыка, но лелькуйтчыны таын сийо эз
вермы.

Абу диво, кодсюрёлы ко эз кажитчы тайо да Кура-
товлөн содисны врагъяс. Но тани сийо некутшом ком-
промисс выло эз вермы мунны: тайо эсько вולי аслас
туй визысь кежом. Распутинъясид од асланыс «вир-
шаясон» косийсны шедодны духовной звание, медым
доны бур пастырьясон «доброй христианалы», а Ку-
ратов ас йывсьыс век жо думайтлис мод ног: сийо кос-

йис койны югыд билысь зарни югөр пемыд гуо, кызди
вөлі пасйома аслас тетрадын.

Но думайт — эн думайт, а ставыс помасис: öні
со муніс аслас чужан муысь, петіс кузь туйо, медым,
гашкө, некор бөр не волыны татчө. Мыйкө сьолөм вы-
лас кыліс сэтшөмөс, коді висьталіс та йылысь. Вер-
мас лоны, и ассыс мамсө медбөръяысь аддзылас. Рас-
путинъяс, Кокшаровъяс да Левицкийяс вермисны ним-
кодьясны.

Ок, шудтөм тайо воыс сылы!

* * *

Карын олөмлөн став бөръя лунъясыс паметыынөсь.
Найөс позис лыддьөдлыны öти бөрся мөдөс.

Кольөм воө сійө гөгөрвоис: карын сійө абу кузя
олысь. Öтчыд сійөс ас дінас корис протоиерей Кокша-
ров — асланыс училищеса смотритель. Сійө заводитіс
ылісянь — воспитаниеын челядьлы религиозно-нравст-
венной подувъяс сетөм йылысь, псалтырь дінө да часо-
слов дінө найөс велөдөм йылысь. Но Куратов пыр жө
гөгөрвоис, кытчө синө смотритель.

— Мый ті көсянныд шуны, Пётр Захарыч? — тор-
кис сійөс Куратов. Смотрителькөд Куратов пыр вөвлі
резкөй, эз радейтлыв сійөс, эз лыддысылыв сылөн ду-
ховной санкөд. — Висьталөй веськыда!

— Тіян поведениеныд, Иван Алексеевич, уналы
оз во сьолөм вылас, — велөдана ногөн кутіс висьтавыны
смотритель, кызды быттө ичөтик школьниклы. Ок, ку-
тшөм öні вөлі мустөм сылөн гөлөсыс! Кокшаровлөн
сэсся гөлөсыс чорзис, синсьыс воши öнөдз муртса төд-
чымөнъя ворсыштысь нюмыс. Кокшаров и ачыс эз ра-
дейт тайо ёсь кывъя семинаристсө, коді код төдас мыйö
пуктө асьсө, лысьтө сувтны сылы паныд. — Ті сетад
лишней уна вөля асланыд воспитанникъяслы, кор на-
йөс колө кутны повинованиеын да страхын. Ті лэ-

дзанныд вѳчны унатор сѳтшѳмѳс, мый духовно-приход-
скѳй школаын оз позь...

— Сїдзкѳ, господин смотритель, ме ог шогмы тїян-
лы?— веськыда юалїс Куратов сїдз жѳ официальной
тон вылѳ вуджѳмѳн.

— Ме ог на кѳсйы тайѳс шуны талун, но кывсѳ —
преосвященство абу дѳвѳлен...

— Гашкѳ, господин Левицкий либѳ квартальной
Епальский?— серѳктїс Куратов.

— Господин Куратов! — смотритель чеччис крес-
лѳсьыс. Ичѳтик тушаа, тїралан льѳбьяса да сувтса син-
ма, сїйѳ ѳнї дзик вѳлї скѳр пон кодъ — вот-вот уськѳд-
час сы вылѳ. Куратовлѳн пуис жѳ сьѳлѳмыс, но мый
вынсьыс кутїс асьсѳ, весиг синъясыс эз вѳрзъывны.

— Господин Куратов! — мѳд пѳв шуис смотритель
ещѳ на чорыда, весиг ачыс тешкодъ кыпѳдчылїс кок
чуньяс вылас.— Тї сѳрнитад духовнѳй морткѳд, и по-
лицейскѳй чинъяс вылѳ ыстысьны дзик нинѳмла.
А веськыда кѳ шуны — и господин Левицкий тшѳтш.
Корлѳмаѳсь нин тїанѳс сы ордѳ, и кывзѳм пыдди тї
сѳнї код тѳдас мый вѳчѳмныд... Сѳсся, тїян уна небла-
гонадѳжнѳй тѳдсаяс... А ми ог кѳсйѳ, медым церков-
нѳй училищєын челядѳс велѳдысь вѳлї кытчѳкѳ ним-
сѳ лякѳма... Тайѳ оз лѳсяв миян верноподданническѳй
чувствояслы... Кывсѳ еще — тї судзѳдад быд ногыс
да корсялад сѳтшѳм книгаяс, кодъясѳс миян пѳв-
стын абу шуѳма вѳдитны. И медбѳрын — тїян виршаяс,
кодъясѳс тѳдѳ став карыс...

Сѳрни вѳлї кузь да ыджыд. Василий Евгєньевич-
лѳн висьталѳмыс абу вѳлѳм весь. Воис кѳ нин сѳтчѳдз,
мый сьѳн заинтересуйтчис ачыс преосвященство — тѳ-
дѳмысь, позьѳ виччысьны быдторсѳ. Мѳдарѳ кѳ, танї
нинѳмла и шєнзынысѳ. Смотритель, дерт, ассяныс
прав. Ставыс збыль: и полицейскѳй управлениеын
зык, кытчѳ сїйѳс корлїсны ѳлѳдны ссыльнѳй полякъ-
яскѳд волысьѳмысь, и ѳткымын сѳрнияс, кодъясѳс

сійо панліс эз нин өтилагын, и аслас виршаясыс, кодъясөн сійо сотліс югыд кизаясөс. Көть и омөлика, но век жö найö кодсюрöлы вöліны тöдсаөсь...

— Ме ог гөгөрво тiянöс, Иван Алексеевич,— тыдалö, медбөръя көзырсö мыччис смотритель.— Тiян вокъясныд — ставныс төлка йöз, а тi...

— Быдöнлөн аслас туй, господин смотритель,— шуис Куратов.— Позяс мунны?

— Думыштлöй, Иван Алексеевич, бурджыка,— кылiс Куратов смотрительлыс бөръя кывъяссö.

Куратовлы öнi ставыс вöлі веськодъ. Кокшаров ордыс петöм бöрын Куратов дыр ветлöдліс «прешпектъяс» кузя. Уличаяс вылын некод эз вöв: кадыс вöлі водз на, быдөн на удж вылынöсь. Кыр увсянь карса Спасскöй улича кузя гөрбыльтiс-кыссис Ненила пöч. Пöчлөн гөрбыльтчöм мыгöрыс кажитчис символичнöйөн: абу-ö и став олöмыс гөгөр тайö пöрыс пöчöыс кодъ жö? «Көть мед Левицкийыс паныдасис!» — скöрыс думыштiс Куратов. Öнi сійо вöлі дась медся лөк встреча вылö...

Воис кар шөрö — Сычов лавка дiнö. Сыкөд паныдөн мезонина öти судта керкаын олiс Кичин. Недыр сувтовкерліс öшинь улас, виччысыштiс — оз-ö көзяиныс чукöст.

Восьса öшинь пыр некод эз тыдав, дай керкаын некутшöм шы эз кыв. Но Куратов тöдiс — Кичин должен лоны гортас. И решитчис пыравны: кодкö ордын колiс разöдны чöжсьöм мөвпъяссö.

Кар пасьтаын ещö некытчö мöдлаö сэтшöм окотапырыс эз воливлы Куратов, кыдзи Василий Евгеньевич ордö. Мед найö унаторйын эз лöсявны, но сылөн камин дорын век жö лöсьыд вöлі варовитны, торъя нин төвся кузь рытьясö, кор ывла вылын пöльтö бушков да сьöлöм вылын торъя гажтöм. Сэтшöм дырйиыс веиг книгаяс омöля отсалöны öддзöдны кадлыс пыр öтмоза мунöмсö.

Кыдзи и пыр, Василий Евгеньевич сійö воөмлы вöлі рад. Вöлөмкө, Кичин коймөд лун нин висьөдчө — кын-мыштöма уткаяс бөрся ветлiгөн да öнi пукалiс гортас.

— О, миан пиит! — кыкнан кисö нюжөдөмөн сійö петiс Куратовлы воча. — Бара эпиграммаясөн? Лыдди тәнсьыд «Лун-вой сөйысьястö». Неуна резкөй, но тэнад сяма. Аддза Иван Куратовөс! «Оз веж пет корысьлөн, кор озырөс шог косьтас?» А кыдзи градоправительяс? Век пиньысö кеслөны?

Куратов пуксис пызан дорö, мыйкө дыра чөв олiс. Василий Евгеньевич казялiс, тыдалö, сылысь настрое-ниесö, тшöтш ланьтiс.

— Вöли ыджыд сөрни господин протоиерейкөд. Ок, ог радейт ме кузь пöдрасника йөзсö! Ыджыдö пуксьö-ны, көть и нинөм оз сулавны. Сөрнитны накөд сьökыд, гөгөрвоны — нинөм оз гөгөрвоны...

— А тэ эн сибөдчы сэтшөм йөз дiнас, другöй ме-нам! — нюммунис Кичин. — Коллежскöй ассессорьяс да министерствоса корреспондентьяс, кыдзи и полицей-скöйяс да протоиерейяс, лыддыссьöны ыджыд йөзөн. А тэ преосвященствоөс дөзмөдан...

Оз позь вöли гөгөрвоны: збыль сөрнитiс Кичин али сералiс. Куратов төдiс — вöли сылөн татшөм мо-даыс.

— А кыдзи тэнад Александра Ивановна? — вежис сөрнисö Кичин. — Любов пыр паськалö?

Бөрья каднас Василий Евгеньевичлөн тайö вöли пырся шмонитан тема. Александра Ивановна, карса мещанин Поповлөн ныв, кутшöмакө вöли Куратовлөн идеалөн. Мичаник, збой синьяса да сөрниö пырөдчысь Сандра волiс сылы сьөлөм вылас. Забоевьяс ордын овлысь уна нывьяс пиысь сылы öтнаслы быттö ставыс вöли веськодь. Но Куратов аддзывлiс, кыдзи сөрнитысь вылысь синсö вештывтөг ныв сюся кывзiс быд кыв, и чужөм сертиыс бура позис аддзыны — мый сылы воö сьөлөм вылас, и мый оз.

Куратовлөн гортас пызан вылын куйлісны нывлы
сийом өткымын строфаяс. Найос гусьон видзис йоз
синъясысь. Кыдзи Василий Евгеньевич тодмаліс сы-
лысь гусяторсö, вöлі гөгөрвотом. Сандра дінö чувство
вöлі ас сьölöмын кутантор, кодос йозлы петкөдлыны
Куратов лыддис мисьтөмөн. Йозысь гуся чувствойс
аслыс кажитчис сөстөмджыкөн.

И быттö нарoшнö, Кичин читкыртыштліс синсö да
лыддис:

Шондібанöй
Бур таланöй,
Муса мича ныл!

Куратов ачыс кыліс, кыдзи став чужöмыс гөрдөдіс.

— Александра Ивановна — бур ныв, — водзö вись-
тавліс Кичин. — Дерт, ыджыд приданнöй тэныд оз вай,
но пöдругаөн олöмад лоас... Гөтрась, семья лөсьöд, и
ставыс ладвыв пуксяс...

— Ставлы аслыс кад, Василий Евгеньевич, —
збылгысь вочавидзис Куратов. — Менам призвание:
отсавны аслам народлы петны пемыд гуысь... Сы
вылö ме сета ассьым вын. И аслам шудöй сыкөд жö
йитчöма. Оз вермы лоны сійö менам, кытчöдз олöмын
ассьым места ог аддзы...

— Унаөн сысянь заводитöны, но помалöны быдөн
өтмоза: ас семьяөн, шоньд пельöсөн. Тайö — вернöй-
джык...

— Ме абу быдөн, Василий Евгеньевич, — шуис Ку-
ратов чорыда, сувтіс да прöйдитчис комната кузя, ме-
дым веськөдны позявны заводитөм кокъяссö, вөрзьөд-
ны вир-сөнсö. Сэсся локтіс Кичин дорö, висьталіс: —
Ме — ачым, дай ачымөн коля...

— Мед отсалас тэныд ен, муса друг!

— Ен вылö ог надейтчы.

— Тэ — йоз вылö? Вывті уна кутöдыс, кодъяс
тэнö оз сибöдны йоз дінад. Дай кутшөм меным, весь-

кыда кө шуны, йёзөдзыс делө? Ме велөда налысь челядысө, восьта налысь син, и мясянь — тырмас. Не ми кодь йёз кутчысьлісны олөмтө вежны, но унджыкыс помалісны Сибирён. А ме тайёс ог көсйи!

Таын найё бара жө торъявлісны. Куратов радейтліс йёз дінын бергавны, ветлыны войпукъясө, кывзыны сәсь сылөм, гаж, серам. Мед көть кутшөм сёкыда лунтыр уджалісны том йёзыд, рыт кежлө налөн кольліс вын и гажөдчыны, и шмонитны. А Василий Евгеньевич ёнджыка радейтліс бур книга, надзөник ломтысьыс камин, тэрмасьтөм сёрни лөнь собеседниккөд.

Вөлі ещө өти слабин Куратовлөн: сиктса празникъяс да свадьбаяс. Сәні Куратов дзикөдз вежсьывліс. Василий Евгеньевич шуліс тайёс «ворсөмөн», а ачыс Куратов — «лов кыпөдөмөн». Йёз кост сылан-кывъясас сійө кыліс олөмлысь гыалөм, пемыд гуын олысь йөзлысь лов шы. Но өтитор төдіс Куратов: коркө не коркө налөн Василий Евгеньевичкөд туйяс торъяласны. Вывті нин найё вөліны разнөй йёз. Төдөмысь, куш семинарскөй воясса дружба вылад крепыд йитөд дыр кутсыны эз вермы. Та вылө коліс бурджык «шомөс».

— Сибырын, шуан? — юрсө кыпөдіс Куратов. — Верма шуны өтитор: сәтчө веськалысь йёзыс оз нин лыддыны асьнысө зөв шудтөмөн. Төдісны өд, мый вылө мунісны...

Рытторувнас нин Куратов петіс Кичин ордысь. Пырны кытчөкө ещө эз вөв окота, паныдасыны кодкөдкө — сідз жө. Забоевъяс дінті лэччис собор ув кыр йылө.

Сыктыв ю лөня нуис асьыс васө. Пукаліс арся кос поводдя, кор эз на вөв көдзыд. Лөсьыд татшөм рытьясө пукавны орччөн радейтана нывкөд, кывзыны сылтысь кутан лов шысө. Сылөн эм, — Куратов тайёс ачыс гөгөрвоис, — радейтны и мустөмтны кужысь

сьолөм, а вот олөм туй ылө некыдз оз вермы сувтны кыкнан кокнас, — думайтис Куратов джуджыд кыр йылын пукаліг. Дум вылас уси аслас «Пыж». Став олөмыс аслас өні Куратовлы кажитчис ва паныд ка-төмөн, — гырысь көсйөмъяс морөс пытшкын, но сыысь гырысь кульпуяс, кодъяс кутисны сійөс сойбордйөдыс, эз лэдзны прамөя сынны ва паныд, весиг ыджыдджы-ка өтчыд сыныштны став вынсьыс.

Рытя рөмыдыс казытыштис и мөдтор:

«...И төда,
Кыа петтөдз татөні,
Татшөм пемыдын ме пөда».

Мый көсйөны сылысь тані? Мед ланьтис? Мед чөв өліс, кыдзи көкъямыс во сайын учитель Богданов? Но өд сылөн вөлі сөмын нейджыд гижөдтор губернскойй ведомостьясың уездной школаын велөдан да воспи-тайтан методъяс йылысь, а Куратовлөн гижөма моз-дорөн нумөн: сәні ыджыд программа, и ставыс вич-чысьө ассьыс кад.

Оз, оз ло на ногөн!

«Петас, вокъяс, шонді-й тан!
Ме нин аддза — рөммө ылын...
И енвелтса лысваыс
Югйыштас сэк шонді ылын!»

«Эз кө вөв тайө надеяыс, эз сулав эськө и овны», — кымынөдысь нин решитис аслыс. Но кыдзи матыст-ны шондіыслысь югйыштөмсө? Та ылө вочавидзны вөлі сьөкыд.

Да, эз унатор удайтчы вөчны нель во чөж учите-лялігөн. Челядлы коми кыв ылын лыддысян книга лөсьөдөмысь ковмис эновтчыны. Коми грамматика ги-жөм — колыны локтан вояс ылө. Весиг роч поэтъяс-лысь стихъяссө челядлы коми кыв ылө вуджөдөм

лои энэвтны: мый вöчöма — ставыс куйліс тетрадь-
ясын.

Куратов казытыштис, кыдзи карö воөм бöрын пер-
войя кык восö челядьöс ковмис велöдны Собор вичко-
лөн көлөкөльнича пос улын. Көдзыд, пемыд. Челядь
пыр лөзөдöмaөсь. Кысь нин сәні бур велөдчöмыс. Сәс-
ся эськөн училищелы и вöчисны выль керка, но ёна-
сö нинөм жö эз вежсы: велöдысьясыс öд колисны
важъясыс.

Сідзи нин сылөн артмö олöмыс, мый сөмын аслас
сөвестыс медся ыджыд судья. Мукөдторйөн йөз во-
дзö паськыда петны вöлі нинөмөн на дзик. Но куш
сөвестыд вылö пыксыны сыöкыд — сійö вывтi ас
кежся, тыдавтöм... Та вöсна и сылөн сьölöмыс некор
эз бурмыв да ассыс сё шайта вогөгöрся жалöваннö-
сö лыддис невöльниклөн паёкөн, а виршаяс вылö став
пуктöм кадыс и выныс воши весь — найö сьölөм бур-
мөм эз жö сетны: куйлісны пызан вылын, тырисны
бусөн. Воас-ö кад, кор поэтлөн гөлөсö мөдасны кыв-
зысыны?

Дум вылас усины Василий Евгеньевичлөн кывъяс-
ыс: «Не ми кодь йөз кутчысьлісны олөмтö вежны,
но унджыкыс помалісны Сибирөн». Корсыны Сибирö
туй, кыдзи мукөд? Но сылы пыр кажитчыліс: выныс
сылөн та вылö оз тырмы. Мунны кытчöкө татысь?
Но — кытчö? А заводитісны кө нин полицейскöй уп-
равлениеясті кыскавны да преосвященствоөн повзьöд-
лыны, то бурөн оз лэдзчысыны. Абу-ö бурджык — ас-
лыс гөрөдсö разыны?

Сухановъяслөн кыз стенъяса каменнöй керка дін-
ті кайис гортас. Бара казытыштис школaсö: збыльыс
мöй лоас торйөдчыны школаö котралыс зонпоснияс-
көд? Көсйис налы сетны гражданскöй чувствояс, но
оз лэдзны, тыдалö, тайöс вöчны, тойыштасны на ді-
нысь.

Пырис комнатаас да надзѳникѳн пѳрччысис. Сэсся восьтис ѳшиньсѳ да горша кыскыштис ыркыд сынѳдсѳ, дыр видзѳдис узыысь кар вылѳ. Мыйкѳ коліс вѳчны сэ-тшѳмтор, мед эськѳ йѳз кыласны сылысь гѳлѳссѳ,— думыштис ачыс.

Кѳнкѳ ылын, Сибириын, эмѳсь йѳз — ѳнѳсь, вына-ѳсь. Лоны эськѳн на кодѳн, юкны налысь судьбанысѳ.

Ставыс артмис зэв кокниа, кыдзи Куратов и ачыс эз виччысь. Кутис кывсьыны, мый корсьѳны йѳзѳс се-минаристъяс пиысь полкѳвѳй аудиторъясѳс велѳдан курсъяс вылѳ мѳдѳдны. Куратов эз нюжѳдчы: пыр жѳ мѳдѳдис шыѳдчѳм Вѳлѳгдаѳ. Тайѳ вѳлі 1864 вося декабрь помын. И во джын мысти нин воис приказ:

«Высочайшим приказом по военному ведомству от 11 июля 1865 года за номером 27 учителя духовных училищ Яренского Авангрит Попов и Устьысольско-го Иван Куратов уволены с работы и определены на службу в штат Казанского военного округа для пригото-вления в аудиторы».

Бытѳѳ ассьыс приговор кырымаліс Куратов, кор-тшѳктисны пуктыны кырымсѳ тайѳ приказ улас. Гѳгѳрвоис ѳтитор: уна надеяяс тайѳн вошины. Вєськав-ны Кавказѳ да сюрны пуля улѳ — ещѳ позис на: ас-сьыд лов пуктыны мукѳдъяскѳд ѳтлаын. Тайѳ кѳть кутшѳмакѳ кутас йитчыны аслас думъяскѳд, мый кѳть кодлѳн эз пет ас йѳзѳс да рѳднѳй кыв радейтѳм, сійѳ, кыдзи ассьыд мамтѳ радейтѳм, пыр ошкана да некор оз вермы лоны серам туйѳ: сійѳ ѳд петкѳдлѳ мортлысь ыджыд сьѳлѳм. Но гижны казеннѳй бумаж-каяс, улѳдз копрасьны югыд кизаяслы либѳ кувны пѳдатьяс тшыг йѳзлысь чукѳртысь ичѳтик чиновник-ѳн — вѳлі медся страшнѳ. Бурджык нин збыльысь вєськавны Сибирѳ!

И вот, Куратов ѳні выль пѳв муніс сійѳ туйѳд, кыті унаысь нин прѳйдитлывліс. Сійѳ жѳ крут чойяс, пос-ныдик ѳшинь розьяса руд керкаяс, ки пыдѳс пасьта

ыбъяс. Мунігчөж юрас бергаліс өти дум: мый кольо сылөн татчө, ас чужан муө? Мыйөн модасны сійос казътывны тані? Али став вит вося уджыс Сыктыв-дінын лоис весь, только еджыд бумага лист вылын сьөд визъяс?

Бөръя лунъясыс карын котөртісны өдйө. Дум вылас воліс Сандрө. Öтчыд пуксылөмөн, тайө вөлі коркө сентябрь помын нин, медбөръяыс аслас уна вося пызан вылын пасйис:

«А ты, зыряночка моя!

Неуж ли горем пораженный

Я буду только в грезе сонной

Твой образ видеть?..»

Мый сійө вермис сетны аслас Сандрөлы? Бурджык нин сідзи разөдчыны.

Каркөд торйөдчөм вөлі сьөкыд, быттьө сьөлөмыслыс ыджыд кусөк торйөдісны. Левицкийяс вермисны нимкодъасыны: найө шедөдісны, мый көсйисны. Но өтитор вөлі бур: Василий Евгеньевичкөд торъялөм лоис зыкө вотөг. Коліс жө аскөдыс унджык бур казътылөмъяс нуны!

Сьөкыд вөлі шуны — мый лоө сьөкөд водзын. Важөн нин виччысис гортас кортөм гөстъясөс (Левицкий кодлыкө ошйысьөма — ме пө судзөда ставсө, медым тайө семинаристсө Сибирө модөдны) да уна гижөдъяс да книгаяс идраліс, а кодсюрөсө бырөдіс. Колис ставсө куим-ө-нөль тетрадь, мый вөлі медся донаыс. Важөн нин ас пыддиыс Куратов лөсьөдліс А. И. Гуговөс. Мед сійө новлөдлө сылыс мөвпъясө. Коді лысытас шуны, мый Гугов да Куратов — өти морт? Мыйлакө сійө надейтчис: коркө гөгөрвоасны Иван Куратовөс. И эз кө сійө вермы вөчны унатор, мый көсйыліс, абу нин сылөн мыж.

Вөліны уна пасйөдъяс «Современник» журналыс, мукөд гижөдъяс. Унджыксө найөс ковмис бырөдны.

Тетрадь листьяс нетшкигөн шыбитсисны и уна невин-
ной гижодъяс, виршаяс. Но жалитнысö эз позь — вер-
мисны Левицкий киö веськавны. Бөрвылас нин, кор
аддзис, мый некод эз волы, жалитіс ставсö тайöс, но
вöчöмтортö тай он бергöд.

Но музасö ассыс эз коль — босьтіс аскöдыс. Сійö
пальöдас шог, кор лоö сьöкыд, сійö сетас сьöлöм гаж,
казытылас став важся надеяссö, а гашкö, и восьтас
выльясöс. Сыысь öткажитчыны Куратов некыдз эз
вермы: ставыс тайö вöлі аслас сьöлöмын, и аскöдыс
кутас шöйтны паськыд Россия кузя, кодарö кöть оз
шыбит сійöс аслас судьбаыс. А Россияöс сійö радей-
тіс став сьöлöмнас, став пытшкöснас.

Кык лун кeжлö сувтіс аслас Кибраö, оліс мамыс
дінын, аддзысыліс чойясыскöд. Некодлы эз висьтав,
кыдзи ставыс артмис — нинöмла вöлі шогö уськöдны
пöрысь мамсö, чойяссö. Чойясыс, Антонида да Татъя-
на, неуна бөрдыштісны. Найö, тыдалö, мыйсюрö гөгөр-
воöмаöсь да жалитісны вокнысö, кöть и эз лысьтны
нинöм шуны ни юавны. Вот вöлöм и прöстöй йöз,
кодъясысь сідзи поліс Василий Евгеньевич!

Колльöдісны Куратовöс рекрутöс моз, став рöдву-
жөн. Кодсюрö чышкалісны синва, и Иван Алексеевич
эз бурöд найöс: сылы и аслыс вöлі сьöкыд.

Гортсянныс петіс рытгоров — луннас тöдса грездъ-
яс пыр мунны эз вöв окота. Мамыс дыр сулаліс öшинь
улас, кытчöдз эз саяв кöлөкöла вöла. Кöлөкөлтьясөн
ветлыны Куратов эз радейтлыв, но талун ставыс вöлі
веськодъ.

Сикт помысь петігөн кыліс ныв-зонлөн сьылöм:
кузь звöз вылын пукалісны том йöз чукөр, гажaa сы-
лісны. Мыйкö тöдса кодъ кажитчис сыланкывйыс.
Кывзысис. Гора тенор босьталіс, а уна гөлöс сэсся во-
дзö нуöдісны:

«Нылö, нылö, тэ ме вылö
Меліджыка видзöдлы!

Месö тэнö, тэсö менö
Окышты да дзигöдлы!»

Тöдöмөн ли тöдтöг, том йöз колльöдисны Куратов-
öс аслас прибауткаясөн, кодъясöс сійö неважөн на ги-
жис коми аньяс корём серти. Сідзкö, нинöм на вöлі
щогсыны: сылөн гөлöсыс коляс татчö, ачыс кöть чу-
жан мусянньыс лоас ылын.

И век жö сьöлöм вылас эз вöv лöсьыд. Мыйкö быт-
тö пыр на виччысис, коді эськö бурмöдас сьöлöмсö.
Куратов вöйтчис додь көрöбö, лэптис воротниксö. Ка-
заньöдз туй вöлі кузь. Уна вося привычка öдöлитис сi-
йöс, и Куратов вунöдчис додь пыдöсын. Виль думьяс
воисны юрас. Татшöм дырйиыс Сыктывдінын сійö
босьтлывліс перö да бумага лист, но öні найö вöлны
пыдынöсь.

Пыр ылö да ылö колис аслас Кибра. Зэв нин ылын
вöлі Сыктывдін кар. Недыр мунöм бöрын сувтісны вö-
лöкö вöвнысö шойччöдыштны. Куратов пырис керкаö.
Кöзяин, ичöтик тушаа, косöдіник мужик лоис зэв ва-
ров да öдйö пырöдчис сёрниö.

— Тимаөн менö шулöмаöсь,— варовитіс кöзяин
«баринкöд». Тöдіс кö эськö сійö, кутшöм «барин» му-
ніс тайö вöрса туйöдыс!— Олам тай со пемыд вöрас...
Шоча-шоча кодкö ми пыр мунлас... Мый кыйыш-
тан — сійöс и сёйыштан...

Кольöм воö на Куратов гижліс стих öти татшöм
Тима йылысь. Казьтыштіс:

«Мый весьшөрö шуны,
Оз бара куж Тима
Пөръялны ни гуны —
Медся на бур нима».

— Код миян коддьöмыс вöсна тöждыяс?— водзö
висьтавліс Тима.— Сідзи и ковмас гуö пырны, тыдалö.
А ті, благородие, кытчö?

Мый вермис Куратов висьтавны Тималы? Варови-
тыштис ещö неуна, кытчöдз ямщик эз висьтав, мый
позьö мунны водзö. И век жö Тимакод сёрниис колис
ассыис сер. Бытьёкö аслас геройяскöд аддзысьлис. Да
тайö тадзи и вöли: татшöм Тимаяссö öд сийö көсйис
петкöдны «пемыд гуысь», көть найö асьныс эз тöдны
тайöс. А кодi нö, не кө сийö, первойöн кутчыяс та
бердö?

И додь пыдöсын пукалiгөн, нывбаба ямщиклысь
вомгорулас нориника сьылöм кывзiг, юрас друг воис:


«Менам муза

Оз ло вуза!»

Да, тайö вöли буретш сийö, мый йылысь Куратов
пыр на думайтис туй чöжыс. И пыр жö сылы лоис до-
лыдджык, сьölöм вылас кокняммис, бытьёö друг
сюри важöн корсянтор.

Куратов петис кузь туйö. Водзöыс вöли тöдтöм, но
эз нин повзьöдлы сэтшöма сийöс.

1948—60 ев.



БИБЛИОТЕКА ШКОЛЬНИКА

Иван Васильевич Изъюрюв

ПРОЩАНИЕ

Рассказ на коми языке

Оформление С. Холопова

Редактор *С. Морозов*

Художеств. редактор *М. Безносоз*

Техн. редактор *И. Цивунин*

Корректор *В. Потолицына*

Сдано в набор 6/II-61 г. Подписано к печати

4/II-61 г. Формат 84×108¹/₃₂, 0,3125 бум. л.

1,025 печ. л. (Уч.-изд. л. 0,74). Тираж 1000.

Заказ № 137. Ц00017. Цена 2 коп.

Коми книжное издательство. Дом печати.

г. Сыктывкар, Республиканская типография
Полиграфиздата Министерства культуры
Коми АССР

2 кѡп.